

## 01

### 省试湘灵鼓瑟

善鼓云和瑟，常闻帝子灵。  
冯夷空自舞，楚客不堪听。  
苦调凄金石，清音入杳冥。  
苍梧来怨慕，白芷动芳馨。  
流水传潇浦，悲风过洞庭。  
曲终人不见，江上数峰青。

## 02

### 赋得余冰

晓日（月）馀冰上，春池一镜明。  
多从履处薄，偏向饮时清。  
比雪光仍在，因风片不成。  
更随舟楫去，犹可助坚贞。

## 03

### 游辋川至南山寄谷口王十六

山色不厌远，我行随处（趣）深。  
迹幽青萝径，思绝孤霞岑。  
独鹤引过浦，鸣猿呼入林。  
褰裳百泉里，一步一清心。  
王子在何处，隔云鸡犬音。  
折麻定延伫，乘月期招寻。

## 04

### 李士曹厅对雨

春雨暗重城，讼庭深更寂。  
终朝人吏少，满院烟云集。  
湿鸟压花枝，新苔宜砌石。  
掾曹富文史，清兴对词客。  
爱尔蕙兰丛，芳香饱时泽。

## 05

### 谷口书斋寄杨补阙

泉壑带茅茨，云霞生薜帷。  
竹怜新雨后，山爱夕阳时。  
闲鹭栖常早，秋花落更迟。  
家童扫萝径，昨与故人期。

## 06

### 开元观遇张侍御

碧落忘归处，佳期不厌逢。  
晚凉生玉井，新暑避烟松。  
欲醉流霞酌，还醒度竹钟。  
更怜琪树下，历历见遥峰。

## 07

### 送虞说擢第东游

湖山不可厌，东望有馀情。  
片玉登科后，孤舟任兴行。  
月中严子濑，花际楚王城。  
岁暮云皋鹤，闻天更一鸣。

## 08

### 杪秋南山西峰题准上人兰若

向山看霁色，步步豁幽性。  
返照乱流明，寒空千嶂净。  
石门有馀好，霞残月欲映。  
上诣远公庐，孤峰悬一径。  
云里隔窗火，松下闻（间下）山磬。  
客到两忘言，猿心与禅定。

## 09

### 题玉山村叟壁

谷口好泉石，居人能陆沈。  
牛羊下山小，烟火隔云深。  
一径入溪色，数家连竹阴。  
藏虹辞晚雨，惊隼落残禽。  
涉趣皆流目，将归羨在林。  
却思黄绶事，辜负紫芝心。

参考史料：

1. 《旧唐书》卷113：

大历中，诗人李端、钱起、韩翃辈能为五言诗。

2. 《新唐书》卷203文艺下：

纶与吉中孚、韩翃、钱起、司空曙、苗发、崔峒、耿泽、夏侯审、李端皆能诗齐名，号“大历十才子”。……起，吴兴人。天宝中举进士，与郎士元齐名，诗语曰：“前有沈、宋，后有钱、郎。”终考功郎中。

注：“前有沈、宋，后有钱、郎。”沈佺期、宋之问、钱起、郎士元。

3. 《郡斋读书志》：

天宝叛涣，述作中废。至德中兴，风雅复振。

---